

## Lo guarracino

Lo guarracino che jeva pe' mmare  
lle venne voglia de se nzorare  
Se facette no bello vestito  
de scarde de spine pulito pulito  
co na perrucca tutta ngrifata  
de ziarella mbrasciolata  
Co lo sciabo' scolla e puzine  
de ponte angrese fine fine.

Co li cazune de rezza de funno  
scarpe e cazette de pelle de tunno  
e sciammeria e sciammerino  
d'aleche e pile de voje marino,  
cu buttune e butturnera  
d'uocchie de purpo, secce e fera,  
fibbia, spata e schiocche ndorate  
de niro de secce e fele d'achiata.

Ddoie belle cateniglie  
de premmone de conchiglie,  
no cappiello aggallonato  
de codarino d'aluzzo salato  
tutto posema e steratiello,  
jeva facenno lo sbafantiello,  
gerava da cca' e da llà  
la nnamorata pe' se trovà.

La Sardella a lo barcone  
steva sonanno lo calascione;  
e a suone de trommetta  
jeva cantanno st'arietta:  
"E llare' lo mare e lena  
e la figlia d'a se' Lena  
ha lassato lo nnammorato  
pecche' niente l'à rialato".

Lo Guarracino 'nche la guardaje  
de la Sardella s'annammoreaje;  
se ne jette da na Vavosa  
la cchiu' vecchia maleziosa;  
l'ebbe bona rialata

pe' mmanarle la mmasciata;  
la Vavosa pisse pisse  
chiatto e tunno nce lo disse.

La Sardella 'nch' 'a sentette  
rossa rossa se facette,  
pe' lo scuorno che se pigliaje  
sotto a no scuoglio se 'mpizzaje;  
ma la vecchia de la Vavosa  
subeto disse: "Ah schefenzosa!  
De sta maniera nun truove partito  
ncanna te resta lo marito.

Se aje voglia de t'allocà  
tanta smorfie non aje da fa:  
fora le zeze e fora lo scuorno,  
anema e core faccia de cuorno".  
Cio' sentenno la si Sardella  
s'affacciaje a la fenestella,  
fece n'uocchio a zennariello  
a lo speruto nnammoratiello.

Ma la patella che steva de posta  
la chiammaje faccia tosta,  
tradetora, sbrevognata,  
senza parola, male nata,  
ch'avea nchiantato l'Alletterato  
primmo e antico nnammorato,  
de carrera da chisto jette,  
e ogne cosa lle dicette.

Quando lo ntise lo poveriello,  
se lo pigliaje Farfariello;  
jette a la casa, s'armaje a rasulo  
se carrecaje comm'a no mulo  
de scoppette e de spingarde,  
povere, palle, stoppa e scarde,  
quattro pistole e tre bajonette  
dint'a la sacca se mettette.

Ncopp'a li spalle sittanta pistune,  
ottanta bomme e novanta cannune;  
e comm'a guappo Pallarino

jeva trovanono lo Guarracino,  
la disgrazia a chisto portaje  
che mmiez'a la chiazza te lo ncontraje  
se l'afferra po' crovattino  
e po' lle dice: "Ah malandrino!

Tu mme lieve la nnammorata  
e pigliatella sta mazziata"  
Tuffete e taffete a muliune  
lle deva paccare e secazzune,  
schiaffe, ponie e perepesse,  
scoppolune, fecozze e conesse,  
scerevecchiune e sicutennoesse  
e l'ammacca osse e pilosse.

Venimmoncenne ch'a lo rommore  
pariente e amice ascettera fore,  
chi co' mazze, cortielle e cortelle  
chi co' spate, spatune e spatelle,  
chiste co' barre, chille co' spite  
chi co' ammenole e chi co' antrite,  
chi co' tenaglie e chi co' martielle,  
chi co' torrone e sosamielle.

Patre, figlie, marite e moglie  
s'azzuffajeno comm'a fere.  
A meliune correvano a strisce  
de sto partito e de chillo li pisce.  
Che bediste de sarde e d'alose!  
De palaje e raje petrose!  
Sarache, dientece ed achiate,  
scurme, tunne e alletterate!

Pisce palumme e piscatrice,  
scuorfene, cernie e alice,  
mucchie, ricciole, musdee e mazzune,  
stelle, aluzze e storiune,  
merluzze, ruongole e murene,  
capodoglie, orche e vallene,  
capitune, auglie e arenghe,  
ciefere, cuocce, traccene e tenghe.

Treglie, tremmole, trotte e tunne,

fiche, cepolle, laune e retunne,  
purpe, secce e calamare,  
pisce spate e stelle de mare,  
pisce palumme e pisce martiello,  
voccadoro e cecenielle,  
capochiue e guarracine,  
cannolicchie, ostreche e ancine,

Vongole, cocciole e patelle,  
pisce cane e grancetielle,  
marvizze, marmure e vavose,  
vope prene, vedove e spose,  
spinole, spuonole, sierpe e sarpe,  
scauze, 'nzuoccole e co' le scarpe,  
sconcioglie, gammere e ragoste,  
vennero nfino co' le poste.

Capitune, saure e anguille  
pisce guosse e piccerille  
d'ogne cetò e nazione,  
tantille, tante, cchiù tante e tantone!  
Quanta botte, mamma mia!  
che se devano, arrassosia!  
A centenare le barrate!  
A meliune le petrate!

Muorze e pizzeche a beliune!  
A delluvio le secuzzune!  
Non ve dico che bivo fuoco  
se faceva per ogne luoco!  
Te, tte, tte, ccà pistulate!  
Ttà, ttà, ttà llà scoppettate!  
Ttù, ttù, ttù, ccà li pistune!  
Bù, bù, bù, llà li cannune!

Ma da cantà sò già stracquato  
e me manca mo lo sciato;  
sicchè dateme licienza,  
graziosa e bella audienza,  
nfi che sorchio na meza de seje,  
co' salute de luje e de leje,  
ca se secca lo cannarone  
sbacantannosse lo premmone.